

खास-खास खबरें

1. बहल फटने ते ल्हास-पस्सियां पौने ज्नेई कुदरती क्रोपिएं दी जबरदस्त मारै हेठ आए दे कठुआ ते किशतवाड़ जिलें च राहत ते बचाऽ अभियान तेजिआ कन्नै जारी न।
2. जम्मू-कश्मीर दे काबीना मंत्रिएं कठुआ च बहल फटने करी होए दे जानी नुकसान पर दुख ते बसोस बुज्जेदे होई सोगी परोआरें गी हर मुमकन मदाद दा भरोसा दोआया ऐ।
3. मुखमंत्री उमर अब्दुल्ला होरें गांदरबल च इक नाबालिग कुडी दी हत्तेआ गी निंदने-जोग ते गैर-मनुक्खी अपराध करार दिंदे होई कसूरवारें गी सख्त कोला सख्त सजा दोआने दा धेइया कीता ऐ।
4. जल शक्ति मंत्री जावेद अहमद राणा होरें जम्मू-कश्मीर दा राज्य दा दर्जा ब्हाल करने गी लेइयै पुंछ च इक दस्तख्त अभियान रम्भेआ ऐ।
5. मौसम दे खराब सूरतेहाल दे मद्देनज़र अज्ज जम्मू खित्ते च सब्भनें स्कूलें गी बंद रक्खेआ गेदा ऐ। कल 19 अगस्त तोहडी प्रदेश च भारी बरखें, चानचक्क हाड़ औने ते गरज-चमक कन्नै बरखा बरने दे असार न।

<><><><><><>

Rescue Operations (Byte)

कठुआ जिले दे जुथाना, घाटी ते जोड़ खड्डु इलाकें च बहल फटने ते ल्हास-पस्सियां पौने दी कुदरती क्रोपी दे बाद राहत ते बचाऽ अभियान तेजिआ कन्नै जारी न। फौज, एन.डी.आर.एफ, एसडीआरएफ, पुलस ते मुकामी प्रशासन दि'आं टीमां, प्रभावत इलाकें च मेडिकल दिक्खभाल दि'आं सुविधां ते राहत ते आबादकारी जकीनी बनाने दा कम्म करै करदि'आं न। दुई बक्खी किशतवाड़ जिले दे चशोती ग्रांऽ च बहल फटने दी कुदरती क्रोपी दे बाद अजें बी मलबे हेठ दबोए दे लोकें दी तलाश लेई राहत ते बचाऽ अभियान तेजी करी दिता गेआ ऐ। मुख सचिव अटल डुल्लु होरें जम्मू दे गौरमैट मेडिकल कॉलेज अस्पताल जाइयै उत्थे ज़ेरे इलाज लोकें कन्नै मलाटी कीती ते उ'नेंगी उपलब्ध करोआए जा'रदे इलाज-मुआलजे दी बवस्था दा जायजा लैता। मुख सचिव होरें पीड़ित लोकें गी हर मुमकन मदाद दा भरोसा दोआया। इस मौके पर मीडिया कर्मिएं कन्नै गल्ल करदे होई मुख सचिव होरें दस्सेआ जे कुदरती क्रोपी दी मारै हेठ आए दे लोकें गी मेडिकल दिक्खभाल दी सुविधा सने उ'नेंगी राहत उपलब्ध करोआने ते उं'दी आबादकारी लेई बचाऽ टीमां अनथक जतन करै करदि'आं न। मुख सचिव होरें अगगे आखेआ

<><><><><><>

Cabinet Min Condolences (Byte)

जम्मू-कश्मीर दे काबीना मंत्रिएं कठुआ दे जुथाना, घाटी ते जोड़ खड्डु इलाकें च भारी बरखें, बहल फटने ते ल्हास-पस्सियां पौने ज्नेई कुदरती क्रोपिएं करी होए दे जानी नुकसान पर दुख ते बसोस बुज्जेआ ऐ। जल शक्ति मंत्री जावेद अहमद राणा, सेहत मंत्री स्कीना इत्तू ते ट्रांसपोर्ट मंत्री सतीश शर्मा होरें सोगी परोआरें प्रति हमदर्दी जतांदे होई उ'नें सरकार दी तरफा हर मुमकन मदाद दा भरोसा बी दोआया ऐ। तोआई मंत्री सतीश शर्मा होरें कठुआ जिले दा दौरा लाइयै कुदरती क्रोपी दी मारै हेठ आए दे परोआरें कन्नै मलाटी कीती ते बिपदा दी इस घड़ी च पीड़ित लोकें दे कन्नै खड़े होने दी सरकार दी वचनबद्धता गी फही पक्का कीता। मगरा उ'नें पठानकोट आहले फौजी अस्पताल जाइयै उत्थे ज़ेरे-इलाज लोकें दी डोल पुच्छी। अपने दौरे दरान मीडिया कर्मिएं कन्नै गल्ल करदे होई मंत्री सतीश शर्मा होरें आखेआ

<><><><><><>

Udhampur Tributes

चशोती दे कठुआ च बददल फटने आहली घटना च मारे गेदे लोकें गी श्रद्धांजलि भेंट करने आस्तै उधमपुर दे मुकामी दुकानदार- बपारमंडल- विधायक पवन कुमार गुप्ता- SHO- NGO ते समाजी कार्यकर्ता लाल चौक गोल मार्किट किट्टे होए। इस मौके मोमबतियां बालियै- मारे गेदे लोकें दी आत्मा दी शांति लेई ते घायलें ते लापता लोकें लेई बी दुआ कीती गेई। इस मौके 2 मिन्टे दा मौन बी रक्खेया गया। उधमपुर वैस्टल थमां विधायक Pawan Kumar Gupta होरें इस मौके बोलदे होई आक्खेया.....(बाईट)



CM Minor Girl

मुखमंत्री उमर अब्दुल्ला होरें गांदरबल च नाबालिक कुडी दी हत्या दी सख्त लफजें च निंदेया कीती ऐ। इस घटना गी अमानवीय ते निंदेनेजोग करार दिंदे होई- उनें सोगी परोआर प्रति हमदर्दी जाहिर कीती ऐ। मुखमंत्री होरें आक्खेया जे इय्यै नेइयां घटनां समाज दे ताने-बाने गी हलाई दिन्दियां ना। उनें घटना लेई जिम्मेदार लोकें खिलाफ सख्त कारवाई दे निर्देश दिते। उनें जोर देइयै आक्खेया जे इसदे आस्तै जिम्मेदार लोकें गी कनून मुजब सख्त सजा दिती जानी लोडचदी।



PTC-Announcement

आकाशवाणी जम्मू दे क्षेत्रीय समाचार एकांश आसेआ जम्मू जिले लेई अंशकालिक संवाददाता यानि PTC लेई दरखास्तां मंगियां गेइयां ना। इच्छुक आवेदक जेहदी उमर 24 थमां 50 बरें दे बश्कार ऐ ते ओहू जम्मू जिले दा रौहने आहला ऐ, एदे लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोडचदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंधत लोडचदे उपकरणें वगैरा दा इस्तेमाल करना बी औना चाईदा। आवेदक जिला सदर दफतर दी 10 किलोमीटर दी हद्द दे अंदर-अंदर रौहदा होना चाईदा ऐ। दरखास्त ते लोडचदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू च 31 अगस्त 2025 संजा 6 बजे कोला पैहले- पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।



Statehood Sign

पुंछ जिले दी मेंढर थाहर जल शक्ति मंत्री जावेद अहम राणा होरें जम्मू-कश्मीर दा राज्य दा दर्जा बहाल करने लेई दस्तख्त करियै इस पेठा अपनी सहमति देने आहले Signature Campaign दी शुरुआत कीती। इस अभियान दी घोषणा मुखमंत्री उमर अब्दुल्ला होरें कीती ऐ तां जे राज्य दा पूरा दर्जा बहाल करने च लोकें दी मदद बी लैती जा ते इस अभियान गी गति थोई सकै। इस मौके किट्टे गी सम्बोधित करदे होई राणा होरें लोकें गी इसदे च सक्रियता कन्नै हिस्सा लैने आस्तै आक्खेया। उनें जम्मू-कश्मीर दे नागरिकें दे हक्क, आत्म-सम्मान ते पंछान दी हिफाजत करने दी महत्ता गी उजागर कीता।



Khelo India

औंदी 21 थमां 23 अगस्त तोहड़ी श्रीनगर दी मशहूर डल झील च आयोजित कीते जाने आले खेलो इंडिया वाटर स्पोर्ट्स फेस्टिवल -2025 दी मेजबानी लेई जम्मू-कश्मीर पूरी चाल्ली तैयार ऐ। इस उत्सव दा मकसद जम्मू-कश्मीर दी सगगोसार संस्कृति, दस्तकारियें ते सैलसफा समर्थ दा प्रदर्शन करना ऐ ते एहदे च तकरीबन 800 खडारी, कायाकिंग, कैनोइंग, रोइंग ते इस चाल्ली दे होरनें मुकाबलें च अपना दम-खम दस्सडन। सरबंधत अधिकारियें गी निर्देश दिते गे न जे ओहू सब्भै लोडचदी स्थूलतां ते सुरक्षा वबस्था जकीकी बनाना। इस उत्सव दा उदघाटनी समारोह बड़ा शानदार होग ते एहदे च ड्रोन-शो, लोक नाच ते मकामी दस्तकारियें दा प्रदर्शन कीता जाहग। जम्मू-कश्मीर खेडु काउंसल ते युवा मामलें सरबंधी मंत्रालय आसेया आयोजित एह उत्सव- जम्मू-कश्मीर दे कुदरती छलैपे ते खेडु सरबंधी जज्वें गी उजागर करोग। इस सरबंधै च इक मुकामी बसनीक नै अपने बचार सांझे करदे होई आक्खेआ



ACS Workshop

उच्च शिक्षा मैहकमे दे अतिरिक्त मुख सचिव शांतमनू होरें सरकारी गांधी मैमोरियल साईस कॉलेज च Art of Living Foundation आसेया आयोजित त्रै-रोजा Yes Plus Workshop दा उदघाटन कीता। नरोई सेहत ते शिक्षा बश्कार डूंगा रिश्ता दस्सदे होई- उनें विद्यार्थियों दे पूरे-पराते विकास आस्तै मानसिक सेहत गी मुख पैहलु दस्सेया। इस कार्यशाला च माहिरें आस्सेया केई सारे गुरु सखाए गे- जेदे च सांस लैने आले तरीके- ध्यान लाना ते होर इय्यै नेइयै गतिविधियों गी सखाया गया। एदे च 80 विद्यार्थियों जेदे च NSS ते NCC दे कैडेट शामिल हे, नै हिस्सा लैता।



School Closed

खराब मौसम आहले हालात दे चलदे स्कूली शिक्षा निदेशालय नै अज्ज जम्मू खिते दे सारे निजी ते सरकारी स्कूल बंद रक्खने दा हुकम जारी कीता ऐ। एह गैं विद्यार्थियों दी सुरक्षा गी यकीनी बनाने लेई पुट्टी गई ऐ। मौसम विभाग नै 19 अगस्त तगर मौसम खराब रौहने दी पेशगोई कीती दी ऐ, जेदे मद्देनजर एह फैसला कीता गया।



Weather

मौसम विभाग नै कल यानि 19 अगस्त तोड़ी जम्मू-कश्मीर दे बक्ख-बक्ख हिस्सें च भारी बरखें दा अलर्ट जारी करदे होई इस दरान बद्दल फटने, चानचक्क हाड औने, ल्हास-पस्सियां पौने ते फ्हाडें परा पत्थर डिगने दे खतरें बारै बी खबरदार कीता ऐ। आकाशवाणी दे जम्मू संवाददाता दी रिपोर्ट मूजब, जम्मू खिते दियें केई थाहें जि'आं जम्मू, रियासी, उधमपुर, राजौरी, पुंछ, साम्बा ते कठुआ सनें होरनें थाहरें पर भारी बरखा पौने दी पेशगोई कीती गई ऐ जिसलै के डोडा, किशतवाड, रामबन ते कश्मीर घाटी दे केइयें हिस्सें च तेज हवा चलने ते दरम्याने दर्जे दी बरखा थमां भारी बरखा पौने दी संभावना ऐ। लोकें गी दरेयाएं-नालें थमां शिंडे रौहने दी सलाह दिती गई ऐ। सैलानिएं ते यात्रुएं गी बी आखेआ गेआ ऐ जे ओहू बड़ा सोची-बचारियै गै अपनी यात्रा दी योजना बनान।

